

<b>CYFARFOD</b>	<b>PWYLLGOR PENSIYNAU</b>
<b>DYDDIAD</b>	<b>17 MAWRTH 2014</b>
<b>TEITL</b>	<b>STRWYTHURAU LLYWODRAETHU CPLIL – BIL PENSIYNAU GWASANAETH CYHOEDDUS</b>
<b>AWDUR</b>	<b>CAROLINE ROBERTS, RHEOLWR BUDDSODDI</b>

## 1. CYFLWYNIAD

- 1.1 Bydd Aelodau'r Pwyllgor yn ymwybodol y bydd newidiadau sylweddol i'r Cynllun Pensiwn Llywodraeth Leol yn dod i rym ar 1 Ebrill 2014. Bydd y newidiadau hyn yn cael eu deddfu dan y Bil Pensiynau Gwasanaeth Cyhoeddus o ganlyniad i adolygiad yr Arglwydd Hutton o'r CPLIL a'r argymhellion yn ei adroddiad. Mae'r newidiadau'n effeithio ar y buddion y bydd gan aelodau'r cynllun yr hawl i'w derbyn yn y dyfodol. Hyd yn hyn, mae'r pwyslais wedi bod ar ddeddfu'r newidiadau hyn er mwyn cyflwyno'r cynllun cyfartal gyrfa (yn hytrach na chyflog terfynnol) erbyn 1 Ebrill 2014. Mae'r newidiadau yma wedi cael eu esbonio i holl gyflogwyr ein cronfa mewn cyfres o gyflwyniadau cyfredol.
- 1.2 Yn ychwanegol i'r newidiadau hyn, mae'r Bil Pensiynau'r Gwasanaeth Cyhoeddus yn darparu ar gyfer y gwaith o lywodraethu cynlluniau'r CPLIL. Bydd manylion y gofynion llywodraethu hyn yn cael eu hamlinellu mewn rheoliadau sydd eto i fynd drwy'r broses ddrafftio a'r broses ymgynghori.
- 1.3 Ystyria'r adroddiad hwn y gofynion llywodraethu a rôl a strwythur y byrddau pensiwn lleol yn benodol. Gofynnir i'r Pwyllgor benderfynu sut y creda y dylid gweithredu'r trefniadau hyn yn ymarferol fel sail i ymateb i'r broses ymgynghori ar y rheoliadau newydd.

## 2. RÔL A STRWYTHUR Y BYRDDAU PENSIWN LLEOL

2.1 Mae'r Bil yn amlinellu pedair rôl benodol i gael eu cyflawni o fewn pob cynllun, sef:

- Yr Awdurdod Cyfrifol
- Rheolwr y Cynllun
- Y Bwrdd Pensiwn
- Bwrdd Ymgynghorol y Cynllun cenedlaethol

2.2 Yn unol â'r Bil, yr **Awdurdod Cyfrifol** yw'r sawl sy'n gwneud rheoliadau i'r cynllun, ac yn achos y CPLIL, yr Ysgrifennydd Gwladol dros Gymunedau a

Llywodraeth Leol yw'r person hwnnw. Bydd yr Ysgrifennydd Gwladol yn parhau i fod yn gyfrifol am y polisi.

- 2.3 **Rheolwr y Cynllun** fydd 'y person sy'n gyfrifol am reoli neu weinyddu'r cynllun' ac unrhyw gynllun statudol cysylltiedig. Mae cadarnhad wedi bod mai yn achos y CPLI, y Rheolwr Cynllun yw'r awdurdod sy'n gweinyddu yn unol â diffiniad cyfredol y rheoliadau CPLIL. Felly, Rheolwr y Cynllun i Gronfa Bensiwn Gwynedd bydd Cyngor Gwynedd fel corfforaeth yn hytrach fel person.
- 2.4 Mae'r **Bwrdd Pensiwn** yn fwrdd sy'n gyfrifol am gynorthwyo rheolwr y cynllun i sicrhau cydymffurfiaeth â rheoliadau'r cynllun, deddfwriaethau eraill sy'n ymwneud â llywodraethu a gweinyddu a gofynion y Rheoleiddwr Pensiynau. Ceir cadarnhad y bydd byrddau o'r fath yn weithredol ar lefel y cronfeydd o fewn y CPLIL.
- 2.5 Mae **Bwrdd Ymgynghorol y Cynllun**, sy'n gorff cenedlaethol, yn gyfrifol am roi cyngor i'r Awdurdod Cyfrifol (yr Ysgrifennydd Gwladol) ac i'r Byrddau Pensiwn.
- 2.6 Felly, o dan ofynion y Bil, bydd y strwythur ar gyfer llywodraethu cynlluniau a gaiff eu gweinyddu'n lleol, megis y CPLIL, fel a ganlyn

a) **Lefel y Cynllun**

Ar lefel y cynllun, yr **Awdurdod Cyfrifol** (yr Ysgrifennydd Gwladol) sy'n gyfrifol am bolisi ac am sefydlu rheoliadau.

Bydd gan **Fwrdd Ymgynghorol y Cynllun** gylch gorchwyl eglur i gynghori'r **Awdurdod Cyfrifol** ar unrhyw newidiadau rheoleiddiol y mae'n eu hystyried yn briodol. Bydd cylch gorchwyl ac aelodaeth y bwrdd hwn yn cael ei amlinellu yn y rheoliadau nad ydynt wedi'u drafftio eto. Er mwyn cynorthwyo'r broses honno, mae bwrdd cysgodol yn cael ei sefydlu ar hyn o bryd er mwyn profi'r strwythur hwn cyn ei amlinellu yn y rheoliadau.

b) **Lefel y Cronfeydd**

Ar lefel y cronfeydd, mae **Rheolwr y Cynllun** yn rheoli ac yn gweinyddu'r cynllun gyda chymorth y **Bwrdd Pensiwn**.

- 2.7 Yn unol â'r Bil, mae dwy rôl benodol i'r awdurdod gweinyddu, mae un ohonynt (**Rheolwr y Cynllun**) yn swyddogaeth ymarferol iawn yn cynnwys gwneud penderfyniadau, rheoli a buddsoddi a'r dasg ychwanegol o sicrhau nad oes unrhyw fuddiannau sy'n gwrthdaro ymysg unrhyw un o aelodau'r bwrdd pensiwn.

Mae'r ail rôl (y **Bwrdd Pensiwn**) yn ymddangos i fod yn rôl sy'n ymwneud mwy â chydymffurfiaeth a chraffu gyda chyfrifoldeb i sicrhau bod **Rheolwr y Cynllun** yn cydymffurfio â'i gyfrifoldebau statudol.

Mae'r Bil yn darparu'n fwriadol i reoliadau'r cynllun ganiatáu i'r **Bwrdd Pensiwn** naill ai fod yr un fath â'r pwyllgor pensiynau statudol presennol neu i fod yn gorff ar wahân.

- 2.8 Fel yr awdurdod gweinyddol, mae gan Gyngor Gwynedd ar hyn o bryd Bwyllgor Pensiynau, sydd eisoes yn perfformio nifer o'r swyddogaethau a amlinellir yn y Bil - gan gynnwys swyddogaethau y bydd yn rhan o rôl **Rheolwr y Cynllun** yn ogystal â swyddogaethau eraill y bydd yn rhan o rôl y **Bwrdd Pensiwn**. Fel rhan o ymarferiad ymgynghori sydd ar y gweill, mae angen i ni ystyried beth fyddai'r ffordd orau i gyflawni'r ddwy rôl benodol a ddisgrifir gan y Bil, naill ai o fewn ein pwyllgor presennol neu o fewn dau strwythur ar wahân.

### 3. YMGYNGHORI AR LYWODRAETHU'R CPLIL

- 3.1 Y bwriad yw na fydd y Cronfeydd eu hunain yn cael dewis sut i gyfarfod â gofynion y Bil Pensiynau'r Gwasanaeth Cyhoeddus o ran y strwythur, bydd hyn yn cael ei benderfynu yn genedlaethol ar gyfer y CPLI yn ei gyfarwydd.
- 3.2 Felly, y disgwyl yw y bydd angen meddwl yn ofalus wrth fynd drwy'r broses ddrafftio a'r broses ymgynghori, i sicrhau bod budd-ddeiliaid y cynllun yn cael cyfle i ystyried rhinweddau naill ai defnyddio'r pwyllgor pensiynau statudol presennol neu gorff ychwanegol ar wahân ar lefel y Cronfa.
- 3.3 Ymddengys y byddai'n gyfleus o ran gweinyddiaeth i alluogi i'r un pwyllgor gyflawni'r ddwy rôl (rheolwr y cynllun a'r bwrdd pensiynau) pe bai hynny hyd yn oed ond o ran yr amser a'r adnoddau sydd ar gael. Fodd bynnag, mae yna rai materion sylweddol y dylid eu hystyried:
- Mae'r rolau yn wahanol iawn ac efallai y bydd angen gwahanol adnoddau, er enghraifft, sgiliau buddsoddi yn un rôl a sgiliau archwilio yn y llall.
  - Efallai na fydd un cyfansoddiad pwyllgor yn medru cynnwys cyfrifoldeb gwneud penderfyniadau rôl rheolwr y cynllun a 'rôl gynorthwyol' y bwrdd pensiynau'n effeithiol.
  - Bydd yn anodd i un pwyllgor gweithredu ac arddangos y swyddogaethau craffu gwahanol.
  - Mae'r bil yn gofyn i'r rheoliadau bennu y dylid cael yr un nifer o gynrychiolwyr gyflogwyr a chynrychiolwyr aelodau ar y bwrdd pensiwn. Byddai cyfuno'r ddwy rôl yn golygu gweithredu'r gofyniad hwnnw ar gyfer y pwyllgor sy'n gyfrifol am y ddwy rôl.

3.4 Nid oes unrhyw benderfyniadau wedi'u gwneud eto o ran a fydd modd dirprwyo rolau'r **Bwrdd Pensiwn a Rheolwr y Cynllun** i bwyllgorau ar wahân neu i'r un pwyllgor.

#### **4 ARGYMHELLIAD**

4.1 Gofynnir i'r pwyllgor ystyried sut y mae'n dymuno i'r rheoliadau adlewyrchu ei sefyllfa er mwyn medru ymateb yn effeithiol i'r rheoliadau drafft pan ddônt i'r amlwg yn ddiweddarach eleni.